

鄉土志叢編

第二輯



鄉土志叢編第二輯總目

鎮安縣鄉土志二卷

富平縣鄉土志一卷

佛坪廳鄉土志一卷

洋縣鄉土志一卷

興平縣鄉土志六卷

鎮安縣鄉土志序

鎮邑志乘同治兵燹板片被燬遂亡其籍官斯土者凡於疆域之廣狹建置之沿革賦役之增損物產之盈虛無借資考證每不能備悉其詳至如官師政績耆舊事業與夫地方治亂民戶聚散人往風微時湮代遠更無從得而稽焉庚子冬圖自保安來署邑篆癸卯調補是缺顧維地處繁要疆土形勢風物人情均有關於吏治非悉心參考不為功惜邑無志乘每思有以修輯之惟是名山石室鮮有藏書野史稗官寂無私乘稽之史冊通志雖間有紀載亦畧而不詳文獻無徵搜訪為難又念志之所係甚大厯前任信述好古博雅能文者豈鮮人哉均未敢言修圖自維簡陋更何敢率爾操觚耶蓋欲修而擱筆者屢矣尋調署定遠同知遂輟丙午回任奉文編撰鄉土志繕讀所定例目與邑乘異名而同旨因思前欲纂修邑乘之難不禁皇然悠然深慮無以應命欲徵本地讀書稽古者二三同志分任其事藉資研究無如邑鮮通人復不可得公餘獨操鉛槧采輯數月迄無端緒屢奉台使檄催缺然無呈勢又不能置之不修無已乃復極意考查廣為訪羅幸得穆玉坪馬氏所藏舊志十卷係乾隆乙亥前令聶燾所輯披而閱之尚明且備第迄今百五十載事變情遷有今之所宜備錄而為舊志所

無者亦有舊志所甚詳備而為今所不必載者即酌其取舍叅以
通志可存者錄之其不必載者畧之所無者或詢耆老之傳聞或
搜各處古廟之鐘鐃碑記節其確鑿有據者摭拾而補綴之其荒
經怪誕疑似依違者去之實有不能採訪而為本境所無者缺之
按照例目編為二卷以成是志非敢曰足供採擇聊以塞責云爾
光緒戊申孟夏知縣事毘陵李麟圖謹序

鎮安縣鄉土志目錄

卷上

歷史

建置

未置本境前

既置本境後

政績

興利

去害

聽訟

兵事

寇匪

耆舊

附 名宦 鄉賢
志義 節烈

事業

學問 缺

人類

種族

戶口

氏族

宗教

實業

卷下

地理

本境方向四界

本境里區

城區勝蹟

山

水

道里

物產

動物

植物

鑛物

動物製造

植物製造

鑛物製造

商務

本境產物

本境製品

入境行銷貨品

鎮興縣鄉土志目錄終

鎮安縣鄉土志卷上

歷史

建置



本境置於明景泰三年復乾祐縣廢地仍為縣曰鎮安屬商州
本朝因之屬州州隸西安府雍正三年陞商州為直隸州先建治
於乾祐廢縣北二十里野珠坪後遷謝家灣即今縣治城建城垣
一座周四里三分置三門東曰永慶南曰永豐西曰永安南有鎮
安河因名設知縣一員典史一員訓導一員 按見各處古廟碑
記鐘鐫前明本境原設知縣一員縣丞一員巡檢一員三岔今名
舊司里巡檢一員五郎壩今屬甯陝地巡檢一員典史一員教諭
一員訓導一員今僅有知縣典史訓導各一員三岔巡檢係明景
泰七年裁缺其餘不知何年所裁無考

未置本境前

本境未置以前為禹貢梁州之域周職方雍豫之墟也舊志謂殷
契封國以史記契封於商為証則斯地之為司徒封內山川明矣
周秦兩漢俱為商地屬洵陽漢隸漢中郡晉分商縣置豐陽縣今
山陽以南皆是也隋因之唐嗣聖十三年析豐陽置安業縣隸雍
州尋復隸商州乾元元年更名乾元縣隸京兆府尋又還隸商州

五代後漢乾祐二年又改為乾祐縣仍隸京兆府宋因之紹興九年宋高宗以地界西割以予金廢為乾祐鎮入咸甯縣元至元十三年設乾祐巡檢至正二十九年復置乾祐縣三十一年又廢明洪武八年仍為乾祐巡檢屬咸甯縣景泰三年復置縣更今名

既置本境後

明景泰三年置本境先隸西安府成化十三年改屬商州仍以州隸西安府明末為流寇所殘徙居縣寨

本朝順治年間仍還治城雍正三年陞商州為直隸州領縣四曰鎮安雒南山陽商南以鎮為諸邑首乾隆四十八年巡撫畢公沅奏設孝義廳同知以本境乾祐廢治舊縣關改為孝義廳治城以石嘴子河畔鐵練橋為界並分土地三山賽秦諸嶺地歸孝義廳管轄溪河紆曲巖谷參差兩界錯似犬牙形勢限之耳又分五部關地為甯陝廳同知轄境以關口之溝口為界按本境雖稱僻壤萬山叢雜八屬毗連至省至州至興安至鄰縣各距三五百里或阻山巒或隔谿水近則漢回繁行土客混淆匪徒易匿訟獄孔多今定以疲繁難要區良有以也

政績

興利

明

知縣俞鼎河南洛陽人明宏治戊午舉人丁卯主山西文衡庚午主四川文衡正德伍年由武功教諭來知縣事尚書劉公璣文廟碑記之尚書雍公泰鎮安修城記亦載其事舊志於修城建學外稱其設場集墾山田捕盜有方賊各解散民有甘棠之愛自景泰復縣於茲幾六十載令尹政績從未有聞所可記載則自鼎始鼎志亦謂其景星鳳凰之先覩也

知縣儀鳳正山西太平監生宏治十六年任建縣署正堂五楹退思堂三楹重門吏舍俱備崇禎三年寇毀

知縣楊永清山西忻州監生嘉靖年間任舊志稱其展修山城桿禦外侮刑清政簡公正廉明

督學烏程沈公季文號太素念鎮安改縣最後無學田萬曆二十二年捐百金飭置業資壬子膏費前任遲未行二十八年太康劉養志號心泉蒞任始購治西五郎壩山地一處嗣米脂教諭艾月攝縣事親履勘驗地周二十餘里招佃墾種歲得租二十二石詳督學諸城臧公爾勸立案昔之書院今之學堂賴是為基礎也

知縣張鳳翼號惺臺南直隸沛縣人萬曆三十一年任舊志稱其捐俸修學振興文教有愷悌君子之頌

知縣郝錦山西沁州人嘉靖十四年以都事署邑宰時詔行天下府州縣文廟咸建啟聖祠鎮安地瘠民貧款無從出曠典未行錦蒞任乃自捐貲相地於文廟左鳩工庀材不月而成其封翁時由家寄資令子辦善舉嘗云為官非以博利清白相傳固有自也知縣鞠思讓山東恩貢生萬曆年間任勤庶務興水利嗣調白水縣勦寇有功陞平涼知府恩賜進士累官薊遼監軍道

知縣陳舜道安陽縣人萬曆年間任重修文昌閣尊崇文教風氣為之轉移

知縣秦來希崇禎間任舊志載其改十五里為兩里十八甲國步將傾生民狹隘難乎其為令矣

國朝

知縣耿晉光江南江都監生康熙初年任舊志載其由縣寨還城百姓安堵自光始殆撫綏之有方也

知縣許泗號方巖真定人順治己亥進士康熙六年任舊志稱其勸課農桑修葺文廟培植學校鎮邑大成殿三字筆力遒勁乃泗置也又有題城隍廟一聯云曰歲曰兵嗟此地瘡痍甚矣捍災禦

惠勿滋天札凶荒錫嘉祥於克永有馮有翼肆吾民享祀虔焉顯
忠遂良須識清龐敦厚綏景福以無疆其立心行政觀此可以推
測豈第文采風流已耶祀名宦詳載縣志

知縣丁鵬浙江仁和貢監生康熙三十一年任舊志稱其留心荒
政招撫流移捐金施粥民多賴活舉卓異陞南城兵馬司

知縣盧躍龍廂白旗貢生康熙四十六年任增建常平倉阜字廩
一座以防水旱

知縣董權文鑲黃旗漢軍監生雍正六年署建忠孝節義兩祠又
請帑同時設立巖屋河雲蓋寺東西社倉兩座

知縣楊華貴州平遠舉人乾隆元年請領司帑建置六房

知縣唐慶曾字介眉雲南晉甯舉人乾隆四年任請帑添建常平
倉一座於縣署門右分樂昇平三廩儲穀至六千餘石又請帑建
明倫堂並立卧碑於堂右

知縣聶燾字間有號環溪湖南衡山縣人乾隆丁巳進士十三年
八月蒞任舉卓異調鳳翔縣在任八年重田功修邑志勤教化撫
流亡多所建白時樓子石進省要衢為蛟水中央巡撫陳公宏謀
重具任事實心特檄監督開闢庫峪口進省新路建治城永慶門
飛樓三楹中塑奎星像曰奎星閣重修文廟文昌宮城隍廟遵儀

制移啓聖祠於大成殿後名宦鄉賢兩祠於戟門左右又建南北
兩社倉分儲社穀於南茅坪野珠坪南鄉以防荒歉於是四鄉社
倉備焉並清查廢寺常住田價建啓秀山房於東門先農壇左以
為義塾鎮邑向無義學設立自熹始也其封翁孱繼構著有誠子
書尤膾炙人口刊錄牧令全書

知縣馬允剛直隸開州舉人乾隆五十七年任修費宮立下馬石
碑盡心民事調沔縣升定遠同知擢安徽池州知府年八十以老
乞歸入定遠名宦祠

知縣范仲趙號斐泉湖南人嘉慶二十五年任集紳商捐重修文
武兩廟閏歲竣工殿宇輝煌俎豆完備百廢俱舉詳載文廟碑記
知縣李希泉號芋邨弱冠成進士道光五年宰保安調署鎮邑化
民成俗振興斯文移安業書院於東門內有碑記

知縣徐崐號石莊安徽桐城縣監生道光二十六年任有循聲其
治績有勸戒條教常社倉規保甲章程設立體仁局樂善堂善政
畢備著有學治錄後署商州

知縣花培江蘇人咸豐七年任修待質遷善各所士紳謂其清慎
恪勤德政卓犖有知無不為為無不盡和風甘雨閭境清平之頌
知縣王兆慶號子餘河南裕州廩貢生同治二年署尋補授在任

五年時髮回擾境城初復招流亡勤撫綏清釐失業解釋脅從扼守黃龍寨以禦竄賊本境徇民中之從逆擇其尤者懲之而安集其餘今逾四十年無敢為匪皆兆慶力也

知縣傅燮號理菴四川仁壽縣舉人同治十二年署時文廟圯塌前任延惠稟請重修籌款未敷中輟燮至鳩工庀材廟內外咸修之殿宇廡廊莫不高轟輝煌廉潔嘉興沈公應奎撰有碑記

知縣張守基號穉雲河南祥符縣監生光緒三年任時當饑饉民多乏食躬親賑務不辭辛勞全活無算

知縣譚光藜號星閣河南商城人同治甲戌進士光緒五年任在任七年時兵燹後縣廨焚燬未修復以書院治事多未便光藜與邑紳士商謀集資興築咸踴躍聽命自門以及堂舍無不修復如舊重修虹化亭嗣遇荒歉籌辦賑務不遺餘力民鮮流離

知縣李天柱號筱軒山西臨汾監生光緒十二年任建常平倉籌設各鄉官渡置買地畝為渡夫長年口食並移昭忠忠孝節義三祠於西門大街

去害

國朝

知縣胡明垣湖廣黃陂縣進士順治七年任升興志廳舊志稱其

罷驛站招流丁除民害其亦乘時而思有為者耶按鎮安今無驛站意明季之亂羽檄星馳固曾設之承平後而請罷去耳

舊時衙署一切費用悉取之里下按糧攤派有田之家不堪其累每有棄業逃亡或以甲糧推乙而乙承之流弊無窮雍正六年官定廉費役給工食知縣某隨將原有陋規概行裁革民乃知有田園室家之樂洵惠政也見聶志惟是年宰鎮者不一裁革陋規者為何人無考

按是年宰鎮者三人均署缺始為魯佐一紅旗監生實授鄆縣去繼為高至行江南江陰舉人丁憂去又為董權文鑲黃旗漢軍監生七年赴澄城實任去

本境常平倉額穀八千石每歲向係出三留七責成各鄉紳保承領借給貧民秋後收還以防霉變惟四鄉寫遠山路崎嶇往返運費耗折甚多各鄉保抑勒攤派民間受無窮之累視倉穀為一大害道光二十七年邑紳士劉魁元等稟請即在本城就近出易其虧折鼠耗等項每年由各保捐錢三百串分上保三串中保二串下保一串發交倉房經書存放以便隨時補買還倉儲穀不至虧損亦可無霉變之慮時邑宰徐崐署州篆批准立石門右同治元年兵燹倉燬儲穀無多知縣王兆慶乞令備平貼自是倉耗由官

捐廉賠補民無攤派累矣

治城逼近縣河源發西壘峪水勢劇猛又有北坡西溝雨水會合
遇雨暴發三水爭流宣洩不及則漫山遍野沙石隨下衝突城垣
時有水患道光二十二年知縣曹士鶴相度形勢在於治城西南
隅三官廟前築修石磯迎流冲折而東水患遂平光緒十九年知
縣陳斯丙復加修補並設金湯局籌款購地收課以為歲修之需
二十九年知縣李麟圖添籌經費重修完固次年大水幸無恙三
十二年署知縣劉林立裁金湯局提租課作學堂經費按學堂固
要政而禦患亦急務惟學堂一時籌款無出姑暫因之容俟設法
而規復焉

聽訟

同治間本境西二區石泉溝客民趙建得鄂之興國州人強逼次
子學智妻邢氏成姦邢氏對姑余氏哭而訴之余氏與夫建得相
詬詈為建得殺私埋匿報知縣李春霞訪聞驗訊詳辦解商州審
勘翻供發回覆審尚未論決李春霞因病出缺山陽縣知縣易亨
兼攝篆務建得乘官更易冀圖脫罪家有傭媪劉老婆與余氏形
貌相似令長子學仁勒死劉媪裝點自縊換出余氏屍身燒燬滅
迹謂余氏之死是縊非殺請官開棺檢驗易亨本有意開脫又念

前官已故無所用其迴護得此情即謂前官承審不實詳請上台
幾為漏網據著中老役言之時前故令適署邑宰焦思善蒞任討

其供詞反覆凝思知是疑獄連日微行私訪廉得換屍裝縊之事
據情上稟指陳李驗之確力詆易詳之謬建得以事破綻不能倖
逃法網遣子學仁赴省上控廉使英公委員提犯証屍棺到省檢
驗發獄局審實建得學仁父子皆論辟易亨亦免官去當時邑人
無不歎焦之神也

本境高峰寨民唐大朋常偽為能巫醫隨機設阱以騙人為事鄰
寨有吳丁氏夫故遺一子甫週齡珍璧無殊也大朋素知丁氏家

有蓄積屢欲設計騙賺無其隙一日窺得丁氏獨抱子在家又見

宅外置有踐碓一事

垣譚新論伏犧制杵白之利後世加巧借身踐碓而利十倍踐碓即此俗人咸呼踏碓

入與丁氏閑談抱其子謊言子命犯搗白煞不破解萬難長成丁

氏愕問有何法術可解大朋答云須將兒置白中毋踐立於杵上

如春米狀閉目勿啓少頃伊為誦經咒數遍煞即解丁氏以為真

信之聽如所為大朋排置畢即入丁氏家搜擄錢物丁氏踐立杵

上遲之又久不聞誦咒聲開目視之適大朋攜錢物出始知其騙

已也欲下阻奪而兒在白中恐為搗斃欲喚人扶護則所住係孤

莊獨戶並無居鄰惟有目視大朋聽其持物而去哭呼甚久來一